



Här Fernand Etgen
President vun der Chamber

Lëtzebuerg, den 2. September 2022

Här President,

Esou wéi den Artikel 80 vum Chambersreglement et virgesäit, bieden ech Iech, dës parlamentaresch Fro un den Här Minister fir Educatioun, Kanner a Jugend weiderzeleeden.

An der Grondschoul feelt et weiderhin u genuch Léierpersonal. Well net genuch „brevetéiert“ Léierinnen a Schoulmeeschteren disponibel sinn, gött och fir d'Schouljoer 2022/2023 op „Quereinsteiger“ (Détenteurs d'un bachelor en relation avec un des objectifs de l'enseignement fondamental) zréckgegraff.

An deem Kontext wéilt ech folgend Froen un den Här Minister fir Educatioun, Kanner a Jugend stellen:

- Wéi vill nei Poste sinn dëst Joer an der Grondschoul besat ginn?
 - Wéi vill dovun vu qualifizéierten Enseignanten?
 - Wéi vill dovun vu Quereinsteiger?
 - Wéi eng Ausbildung haten dës Quereinsteiger ?
 - No wéi enger Critère ginn d'Quereinsteiger erausgewielt, wa méi Kandidaten do sinn ewéi Posten a wie mécht déi Selektioun?
- Zu wéi engem Zäitpunkt kréien d'Kandidate Bescheed gesot?
 - Kréien si bei enger Ofso och eng detailléiert Argumentatioun?
 - Wann net, firwat net ?
- Wéi vill Ausbildungsplaze gött et aktuell fir de „Bachelor en Sciences de l'Education“ op der Uni Lëtzebuerg?
- Wéi wäit sinn d'Verhandlungen tëschent dem Ministère an der Uni, fir des Unzuel an d'Luucht ze setzen?
- Wéi vill Studente kënnen fir dat nächst Ausbildungsjoer ugeholl ginn?

Här President, ech bieden Iech, mäin déifste Respekt unzehuelen.

A handwritten signature in black ink, consisting of several overlapping, fluid strokes that form a stylized, abstract shape.

Martine Hansen
Co-Fraktiounspräsidentin



**Äntwert vum Här Minister fir Educatioun, Kanner a Jugend a Minister fir Héichschoul a Fuerschung,
Claude Meisch, op d'parlamentaresch Fro Nr. 6760 vun der honorabeler Deputéiert Martine Hansen**

Ad 1)

Fir d'Schouljoer 2022/2023 goufen insgesamt 289 nei Enseignantë rekrutéiert. D'Opdeelung ass déi heiten:

Brevetéiert Enseignanten	174
Kandidate mat engem Bachelor, deen a Relatioun mat engem vun den Objektivier vum Enseignement fondamental steet	115
Total	289

Fir all weider Informatiounen verweisen ech am Kontext vun dëser Fro op meng Äntwert op déi parlamentaresch Fro Nr. 6677 vun den honorabelen Deputéierte Josée Lorsché an Djuna Bernard.

Ad 2)

Während der Rekrutierungsphas versammelt sech d'Kommissioun, déi fir de Rekrutement vun de Kandidate mat engem Bachelor, deen a Relatioun mat engem vun den Objektivier vum Enseignement fondamental steet, zoustänneg ass¹, reegelméisseg, fir déi agerechten Dossieren ze analyséieren.

An dësem Zesammenhang ginn d'Kandidaten esou séier ewéi méiglech an no der jeeweileger Kommissiounssëtzung iwwert d'Decisioun zu hirer Kandidatur informéiert. Dëst Joer goufen déi entsprechend Bréiwer tëscht Mëtt Juni an Ufank August verschéckt.

Och hei géing ech fir weider Detailer op meng Äntwert op déi parlamentaresch Fro Nr. 6677 verweisen.

Ad 3) - 5)

D'Uni Lëtzebuerg huet momentan eng Kapazitéit vun 120 Plazen fir Studenten, déi sech am Bachelor en Sciences de l'Éducation kënnen am éischte Joer aschreiwen. Am akademesche Joer 2022/2023 sinn aktuell 119 Studenten am éischte Joer vun dëser Formatioun ageschriwwen. Et ass virgesinn, dës Zuel am Joer 2024/2025 op e Maximum vun 180 Plazen eropzesetzen.

Lëtzebuerg, de 7. Oktober 2022

De Minister fir Educatioun,
Kanner a Jugend

(s.) Claude MEISCH

¹ Dës Kommissioun ass gesetzlech festgehalten am Artikel 19 bis vun der *Loi modifiée du 6 février 2009 concernant le personnel de l'enseignement fondamental*